

四庫全書

集部



欽定四庫全書

蒙陽外史集卷五十六

明 鄭真 撰

祭文

代祭先墓

惟我考妣要安幽宅歲月不留音容如昔明發寤懷德  
報罔極雨露既濡嘉木春鬱事亡如存曷敢不力惟靈  
顧歆永錫祉福



祭土地

惟神正直聰明下土是職先隴安寧繫神之力祀報之  
禮歲時敢忒尚令百世永以為式

祭山靈

惟神天地精英山川靈氣言念先塋實勤祐庇祀報有  
嚴敢稽禮制尚令後來永無失墜

龍王堂祈雨祝文

惟神靈化周流風雲倏忽澤遍下土以生以育惟時孟



夏三農播植膏雨不時瞻望饑渴禱於祠下敢忘厥職  
願施甘澍潤及原隰俾此禾黍其興如淳是種是穫繫  
神之德

祈雨祭龍王文

惟神宅是名山神化周洽民以旱告應不踰夕維時不  
雨有妨農業仰惟靈鑒普遍膏澤俾我畝畝以種以穫  
國有常報敢墜厥職

又



惟神變化不測膏澤流傳維時孟夏天乃不雨仰惟昭  
鑒憫此悠然沛然長此稷黍

代祭陳太丞文

嗚呼醫學之傳代不乏人聖道湮微孰識其真惟公之  
學具有源委手澤所存實究乎理早年穎脫自儒而醫  
當世所望學者有歸起死回生有叩輒應其施無窮其  
功孰並孝慈樂和化行於家喬梓之賢棠棣之華上公  
薦揚暫主教席養素韜光靡就徵辟暮景桑榆希有之



年左圖右書燕樂林泉維明有學肇祀三聖歲久日深  
庫陋弗稱惟公實德之紀之綱百廢具興宮牆有光嗣  
績之賢嚴訓是式教羶從容成此三益旋升於堂音吐  
琅琅忽焉聞訃寧不盡傷老我典刑實深仰止死生長  
別何嗟及矣壽祿在天考終非亡蟄蟄繩繩子孫其昌  
為人作山頭祭文

嗚呼生事葬祭人子始終之禮也我父生六十有九年  
溫清甘旨不獲自盡奉養歸里尤以弗克終事是懼令



從先志以柩車暫殯於九峯僧舍惟是寔窆之事尚俟  
蠲吉罪逆天無所自貸謹以牲饌之奠用伸哀告

代祭越國夫人文

繫惟夫人令儀令德佐我相君忠輔王室淞河以東民  
以寧謐大國之封寵承綸綍子姓多賢位列承弼金紫  
一門榮耀赫奕咸曰耆頤永享天秩薨背奄聞萬家雨  
泣某等一介微賤無能為役幸托門下遂膺厥職結草  
之恩欲報罔極奠祭達誠庶幾昭格



祭先教授文

嗚呼我父之生篤實內充德行文章蔚為儒宗垂志鄉  
飲考禮興樂教道有年興起後學老於鄉閭名聞縉紳  
檄書薦敷錫命明廷嗟我三子嘗侍左右奉命承訓匪  
敢失後歲行在辰六十五年謂我將死命其在天邁疾  
云革氣聚神會遺言琅琅倫理所係扣地呼天罔若有  
聞死生永訣酸苦悲辛歲月云徂條及半載安厝失時  
罪不可貸先隴之側遺命所營奉柩返葬永奠神靈親



長在前義當永別矢詞告哀涕泣嗚咽嗚呼痛哉伏惟  
尚饗

山中祭文

嗚呼昔我父在日嘗欲於六世祖三九府君之側為歸  
葬地未及營建而逝追念斯言豈勝殞絕以茲吉辰奉  
柩車返葬遵遺命也仰惟我父之靈流通昭著百世之  
下永安窀穸俾我子孫勿替引之

代祭贈參政文



惟公高年耆德華表之門實生忠賢作屏大藩煌煌天  
朝推恩有自顯親揚名既尊而貴位參政柄錫命自天  
紫誥金花寵及九泉某忝在戚姻實深贊慶一奠之禮  
曷敢不敬松楸之日桑梓之風百世之下永願無窮

### 代祭母文

嗚呼我母之喪歲已五朞屬時多艱返葬失期顧瞻菴  
居遺植斯在不孝之罪無所自貸維茲吉日宅兆是營  
后祇發秘砂水闡靈爰奉明神俯就筵几矢詞告誠以



奉終始

下葬祝文

南城之陽有原有隰衆水環趨嘉木蔥鬱爰卜宅兆龜  
筮合吉仰惟尊靈永奠窀穸遺澤蔭休百世一日俾我  
子孫承祀無斁

造壽藏山神祝文

惟神宅是名山顯靈下土茲建壽藏先塋是祔后土之  
功具有成緒神其相之永錫是祐



告先廟

茲以地媪效靈壽藏肇建百世之下是祔是依仰惟先  
靈大敷蔭助土石告成山川改觀

祠后土

惟神道化流行威靈昭著山川上下是司是主盛舉之  
陽肇建壽藏百世祔依松楸有光以茲吉辰將釐土石  
惟神相之俾有成績

越國夫人祭文



恭惟夫人盛德慈仁佐輔相國民物同春大國之封寵  
承帝所紫誥金花鸞翔鳳舞厭世僊游逍遙上天我民  
之思有淚如泉俯伏告誠稍酬涓滴惟恩惟德百世罔  
極

九月三日錄先君墓銘副本祭告祝文

比以甬東程氏歸自南京附致臨川雲林先生危公所  
著先君墓銘一通仰惟先君臨終之言夙夜不敢有忘  
閱六載而始得之其紀事詳實觀者謂無愧詞實足以



垂示不朽危公入覲新朝拜翰林直學士出處大節具有公論惟先君之靈有以識之茲因愍忌之辰敬錄副本焚告書篆入石謹當為之尚享

辭考妣墓祝文

真忝以先訓中今歲淞江省秋試鄉貢進士第一名茲將計偕京師謹用告辭墓下若以先考妣之靈獲保其身歸守丘隴則不肖孤榮幸大矣惟考妣實綏佑之

告先聖祝文



真等忝以諸生獲與鄉選茲將計偕京師上膺寵命異日倘不負吾聖君斯不負吾聖人矣尚享

告府主祝文

真忝以鄉選與名計偕有司敦勸戒行有日山川道途風雨露霜跋履之艱惟神實綏佑之

告城隍祝文

惟神神化流行闔郡是司凡在編隸實承綏佑真等忝與計偕戒途有日倘遂言歸敢忘神賜



風師祝文

惟神職司異位功參化樞播蕩周旋四方八區生物之  
功禮嚴祀報牲肥酒香敢以誠告

雷師祝文

惟神位司震動德參乾健威聲所加生物有美歲時祀  
報有禮有儀神斯降止福祉其綏

雲師祝文

惟神功涵變化浮遊太虛為雨為霖生物之功歲時祀



報敢不以禮明靈顧美錫茲福祉

雨師祝文

惟神功參造化澤及寰宇生物四時洋洋流傳祀報之  
禮醴酒有奠仰惟明靈誕錫神祐

境內山川神祝文

惟神造化精英山川靈氣宅是畿甸實勤佑庇以祀以  
報倬有常制酒醴非馨尚鑒誠意

城隍祝文



惟神位正京畿功涵城社祀報之禮以樽以斚風馬雲  
車神其來下永為民生錫此純嘏

祭無祀鬼神告城隍祝文

欽惟聖朝承古之制厲祀有嚴恩涵泉隧赫赫神靈管  
轄之司符攝以來九州罔遺其來于于同享飲食俾爾  
幽冥無有飢渴

中都行大都督府祭旗纛神文

惟神威靈赫赫職司嚮道肅冠軍容敢忘祀報某等忝



分督閩實重本兵禮儀有秩敢布厥誠

又

惟神靈旗直指壯我威武三軍所向戰勝攻取某等欽  
承帝命叨司督府祀享惟誠爰潔牲俎尚享

二月戊日社壇祝文

大社之神

惟神職司坤載澤被黎庶生物之功以稷以泰東作將  
興醴酒有冀仰惟神靈錫此福祉



大稷之神

惟神德契乾心功施坤厚春日載陽俶載南畝有事而  
祈爰潔牲酒惟神之靈俾歲其有

后稷

惟神職司耕稼功及萬世於赫聖朝肇新典制以祀以  
祈有嚴壇壝黍稷非馨尚鑒誠意

勾龍

惟神職司下土生物所宜仲春之月有事而祈黍稷牲



牲品列多儀普為生民永錫蕃禧

風雲雷雨師祝文

惟神功著兩間澤及萬物飛揚鼓動變化充溢祀事虔恭嘉牲孔碩佑此民生永世無斁

山川神祝文

惟神一氣所鍾高下莫域以峙以流功著生植典祀有常壇壝其秩神之格思福佑是錫

祭無祀鬼神告城隍文



於皇天朝仁及幽壤厥類惟多咸使格享仰惟明神實  
司九邑符攝罔遺來飲來食無有渴饑沐浴恩賜各生  
人天魂爽罔滯

中京行大都督府祭旗纛文

惟神氣肅轅門雄武勇烈前軍啓行往無不捷祀報維  
時牲酒芳潔仰惟神明庶幾享格

又

欽惟聖朝禡牙有祭於昭靈神雄武強毅中京督閫實



隆委寄祀報有嚴式遵禮制

又

惟神威武勇烈職司前導三軍克捷荐著功效朝命有嚴以祀以報牲肥酒香敢以誠告

又

惟神威武導揚懋著勲力先聲所向罔不告捷某等忝職中都統兵督府春祀有嚴仰祈福祐

祭韓唯傳文



嗟嗟唯傳而至然耶人之生世有短有修令終歸全吾  
其何由唯生年二十合卺甫畢未有嗣息而遽云夭折  
其命耶抑人耶吾不重為痛惜耶生之家世善慶累積  
氣稟之清姿貌岐嶷幼而知學不事華靡侍坐當隅克  
循轍軌吾在鄉黨頗以學名生祖若父延禮於庭訓汝  
經書勸告丁寧更八九年期底於成聖運肇開吾忝進  
士奉命典教淮山楚水寄生詩篇情莫之既訃告之詞  
忽其在耳年少健強殞絕迺爾而吾薄宦羈旅去墳墓



遠親戚閭里憂病交至安能與造物者周旋終始耶生  
之父母惟生是恃死當復生寧忍終棄師友訣別義須  
執手憑棺臨穴媿吾何有念生平時似夢非夢千里緘  
辭痛當作慟嗚呼唯傳其知也耶

鄧大夫衛國公祭文為鳳陽府作

嗚呼天之生才必以其時際遇聖君龍興開基惟公之  
生如漢三傑提兵四方豐功盛烈冠豸臺端祿厚報隆  
肇開公社金券錫封奉命外廷始終體貌遄歸入覲遽



以訃告某等承乏京郡佩仰容儀開國名勲壽考是期  
今聞喪歸痛傷何極慟哭酬辭靈神昭格

鳳陽府學禮殿上梁告先聖文

茲以禮殿有嚴聿新壯觀斯文萬代妥妥神棲某忝司  
郡府職在作興爰舉修梁用申虔告

告城隍土地文

惟神職司郡府土功陰庇斯文我我校庠載新禮殿修  
梁蠲吉庀役羣工華構告成神其相之



上梁告城隍祝文

某以不才叨承掌教蒙賢令作成之賜賴諸生補助之  
私梁棟以興楠棖悉具用致馨香之薦敢言福祿之祈  
伏願學校興隆室家清吉菁莪樂育願言黽勉以交修  
采藻詠歌庶幾觀感而興起敢忘居處或負神靈尚享  
祭隴西李恭顯王文為鳳陽衛作

惟王帝室懿親王廷碩輔上佐聖明混一海宇奇勲殊  
績書於旂常帶礪䟽封珪組煌煌善慶善積以有賢嗣



出將入相功效尤偉榮養鼎鍾壽期百年從容夷猶令  
終歸全某等忝衛鳳陽聞訃驚怛朝聘瞻戀愴失先達  
池河之陽歸茲佳城冠佩之藏靈神妥寧牲酒微儀敢  
申薦音容儼存錫福有美嗚呼痛哉伏惟尚享

同前為臨淮父老作

恭惟聖明為天下主必得材傑以為佐輔惟王之生河  
岳所鍾龍虎風雲千載奇逢任比股肱親同肺腑嗣續  
象賢將相文武帝眷日深國有老成福祿康寧與享太



平訃告忽聞聖心憫惻美謚王封贈賻寵錫池河之原  
有華新阡淮山拱秀永慰九泉某等忝同鄉社嘗奉顏  
面壽考百年莫致所願靈旌戾止匍匐以來奠醴饌牲  
以寫其哀惟王有靈用綏福履衛國庇民百代其祀嗚  
呼痛哉伏惟尚享

同前為劉指揮仲海作

惟王社稷重臣宮闈近戚輔翼謀猷殊勲異績將相一  
門金紫赫奕從容歸全盛典寵錫某本以微賤伏蒙存



卹比由罪戾以工以役聖恩寬洪幸賜免釋門下之故  
敢忘盛德既想音容感深以泣薄奠致誠靈神昭格

先兄義烏教授先生祭文

維洪武十有二年歲次己未三月戊辰朔越十有五  
日壬午寓臨淮弟鄭真謹附書次男復昇於五月朔日丁  
卯以清酌庶羞之奠敢昭告於亡兄金華府義烏縣教  
諭先生鄭公之靈嗚呼昔我先公實生三子而兄居其  
長文章行義惟先哲是則是倣縉紳君子以先公為有



子矣五十餘年遭家孔艱而傳經講道自任斯文值聖  
運肇興網羅才俊鄉闈敦迫力辭再三訓導郡學實不  
得已里閭從容亦或庶幾而以傾險小人楊侃所薦遂  
至於此道不及行年不上壽山顛水涯幽冥永隔人之  
不幸有如是耶某忝同母弟先公之教誓同周旋雖貧  
無以為家而文獻之緒庶幾不墜洪武壬子以鄉貢計  
偕京師涕淚為別門戶宗祀將兄是望兄在義烏某在  
臨淮每貽書謂曰吾老不得家居而留滯微祿斯命也



夫念汝久客淮海五弟又官塞上兄弟天各一方恐溘  
先朝露終無相見之期矣真時讀之以為此不祥之言  
以吾兄之美才懿德天將厚其福祿以遺其祚胤寧遽  
如是也嗚呼兄之言今果然矣不得相守以老相訣以  
別矣死生晝夜理耶數耶兄固有以知之而真不及知  
之矣痛矣哉寔宥之事義當任職而教職羈縻告歸弗  
遂手足之情不能一息忘也嘗慟哭執筆錄兄文行之  
可傳者凡千六百餘言將告諸當代君子異日遄歸幸



得勒銘墓上庶見區區之心矣茲以小祥遠致薄奠併錄行狀焚白俾兒子告諸靈筵永念乖睽荼毒如割靈神不昧尚綏佑之嗚呼痛哉伏惟尚享

先兄大祥祭文

維洪武十有三年歲次庚申三月壬辰朔越二十一日壬子寓臨淮弟鄭真謹附書次男復昇於五月朔日辛卯以清酌庶羞之奠敢昭告於亡兄金華府義烏縣教諭先生鄭公之靈嗚呼吾兄問學行誼擬諸古人肥遯



丘園永保貞吉而以儉壬率挽勉強一出學官微祿年  
及耄老不得在家以死九原之下或見楊侃豈不當重  
唾其面然修短有數生死何常正命歸全其可以無憾  
矣日月不留大祥云屆教職所羈不得告歸盡手足之  
誼矢詞一奠遠致誠悃異日幸得告遄尚當圖其不朽  
焉嗚呼哀哉伏惟尚享

恭撰大行皇后祭文

伏以位並至尊為天下母如月之照比日同明靈輦仙



遊萬方仰慕致敬致禮臣子微誠

皇陵靈星門祝文

惟神上紀天文下司闔闢壯觀山陵靈旂出入改創命  
工仰祈神力幸相其成敢忘盛德

皇陵祭告土地祝文

惟神職司后土正直聰明神功偉績拱衛山陵奉命改  
觀載經載營惟神之靈盍相其成

為廣信千戶所祭徐太傅文



惟公文武全材生際熙運出將入相上輔明聖開國名  
勲親王至姻所期壽考百歲其春天不憖遺遽爾薨背  
祔典煌煌恩禮兼至可謂生榮死哀也已某等忝守山  
郡聞訃盡傷牲酒致誠涕泗其滂嗚呼哀哉

祭葛知縣文

昔先參政太師在宋為中興名臣文獻閱東南莫尚  
焉而公在孫玄之列可謂克世其家矣際茲盛明奉鑑  
寶精幣講論治道天顏對越禮隆寵渥遂有百里之命



人皆謂老成重望晚節之榮公侯其復始矣逾年入覲  
隨班上萬年之壽宴賜以還稱慶未幾而遽以疾訃嗚  
呼痛哉夫正命考終公之福也民之不淑其若之何柩  
車旅葬致斯文之一慟惟公其鑒之尚享

祭廣信知府謝公文

嗚呼郡守五馬為榮人不易致公一出而得之可謂速  
矣兩月之間闔郡望治而入覲以還聞有玉樓之名何  
遽棄人間世也耶士民於是缺望矣返葬建陽永安幽



宅送終之禮在夫人所自盡也辦香一奠以心感心其  
庶幾乎嗚呼痛哉尚享

同前代本府史經歷作

惟公德尊行高一麾出守兩月之間蒞政未久忝以司  
幕來相後先謀謨畫諾從容周旋歲旦入朝天威咫尺  
拜命以還公遽得疾次於桐廬遂云仙遊存亡迴隔涕  
泗橫流返葬閩關潔牲以祭生順死安公其無媿嗚呼  
哀哉伏惟尚享



祭府李經歷文

嗚呼昔永嘉諸賢與建安伊洛大儒先後相望文章道德扶持世教流風餘範傳至於今而公以世家名閥際今聖運典司郡幕甫及二年而罹於非辜輾轉艱難擠於死地彼妄訴構禍者亦獨何心哉某等忝在斯文實同交誼英邁俊爽有不能忘靈魂些招禮當一奠惟公其鑒之

祈晴文為金太守作



雨暘時若此人情所共欲而天道所難必也邇者霖雨  
過多肅陳忱籲不逾日而霽何天心之克慰夫人也是  
皆吾神仁愛所及有以成夫化育之功爾謹具牲俎為  
謝尚賴曰雨曰暘俯順以致大有年之慶果如洪範所  
謂休徵焉者則神之賜不其大乎尚享

### 祈雨文

上天澤物曰雨曰暘雨暘時若為國禎祥比在五月淫  
雨陰暄籲辭告情天為晴霽爰及初秋六月閏餘天復



不雨仰望來蘇早田頗登晚禾未及農心惶惶憂思慙  
悵天之降災由吏不才民實無罪亦可憐哉造化誠難  
人豈屢瀆一雨滂沱庶幾生育伸請於天曰大有年紀  
報嘉牲敢不潔虔神司吾民責任亦至一念感通俯鑒  
誠意

謝雨祭文

六月置閏亢陽不雨田疇龜坼憫此禾黍衆心惶惶瞻  
仰籲哀慨思明神實與雨偕爰啓靈壇誠祈肅禱民命



有關憑依大造皇穹至仁一念感孚密雲四郊飛洒沾  
濡化工幹旋實難非易暮夜傾盆沛然生意早苗既獲  
憂在晚禾膏澤始終實願滂沱以謝以祈再三有瀆保  
合太和仁慈化育惟神有靈於昭于天爰錫之福曰大  
有年民以不飢神不乏祀用致誠心奠此牲醴尚享

祈晴文

雨暘時若惟天之賜一或有愆為時之戾乃者六月旱  
魃為災一忱有請甘澍大來及茲有秋早禾云穫霖雨



及旬陰霾冥漠黍稷栗言茁其芽螽蟊並興憂在晚  
禾恭請吾神以祈以謝酒香牲肥靈旂是迓陽烏發舒  
爛兮晴曦化化生成為惠實蕃

石神廟祭文

惟神雄踞靈峯最屬魁傑有靈有神雨暘時若一郡之  
望俯慰飢渴國家崇敬用表英烈某欽承上命率禮不  
越秋成祀報盱眙格謹以牲醴幣帛粢盛庶品式陳  
明薦尚享



廣信府祈雨告諭諸廟祭文

比以六月上天不雨旱氣熒熒焚俯憐焦土早稻半收或有或無晚禾未花殆成荒蕪向啟衆誠山川遍禱神若不聞長望穹昊豈吾有司罪戾是多饑饉荐臻民命奈何赫赫神靈鸞車戾止俯伏請命傾心洗耳雖嘗洒洒未及滂沱仰望神功挹彼江河天已云秋風日如火膏澤不流憂實在我牲肥酒香再拜告虔尚使歉歲化為有年



祭陳指揮文

嗚呼鳳陽為帝鄉戚里而定遠藕塘為其屬邑山川靈  
異實生英傑而公幸際雲龍之盛奮於行伍征討南北  
以千夫長守郡廣信軍民安堵從定雲南以一當百出  
奇制勝膚公上奏使節光華而壽命有期遽膺大故有  
識之士皆為出涕嗚呼哀哉某等學校之士辱公禮遇  
文武壯猷言猶在耳靈魂些招公其寧只

廣信府謝雨祭文



天久不雨亢陽兩月今始滂然普遍膏澤海寓含生民  
心胥悅井汲萬家源泉清潔晚稼有成庶無饑渴神明  
盛賜誠孚饗答割牲報祀嘉禮周洽拱送神歸靈旂寥  
泐



蒙陽外史集卷五十六



欽定四庫全書

滎陽外史集卷五十七

明 鄭真 撰

檄

擬唐顏杲卿諭河北諸郡檄

天寶十四載

某

月

某

日常山太守顏杲卿檄告諸

郡等蓋聞建邦設屏實惟有道之長秉律成師合正無  
將之戮守臣當為君而效死義士不與賊以俱生盍濟



奇謀共成偉績我國家德躋仁壽道合希夷萬年敬休  
寢兵戎而不試四時生育與草木以皆春蠢茲狂賊之  
微敢昧聖恩之大安祿山醜凶遺孽敗將俘囚輕巧事  
人公行賄賂奸邪罔上雜出詆譖入宮禁而無嫌睥皇  
儲而不拜寵兼僕射位極真王向嘗指腹以為赤心今  
敢率衆而操白刃范陽數千里莽為蛇豕之區河關幾  
十州盡作豺狼之藪塗炭我黔庶腥穢我冠裳指斥將  
相之臣凌轢王侯之貴吠堯之犬謂秦無人聖上渙號



旁行乾綱獨斷聽鼓輦而思猛士式靖四方提斧鉞以  
授元戎用昭九伐凡居率土不共戴天稱爾干比爾戈  
從公於邁言秣車言秣馬與子偕行大收執訊之威用  
致獻囚之盛幕府職居守土命寄專城泣血剖心爰勒  
軍師之衆卧薪嘗胆忍忘君父之讐方異類之鯨誅幸  
羣心之颺起郭元帥整朔方之甲李兵使興馬邑之師  
張睢陽保鄣江淮哥潼關控臨畿甸止戈為武當鋒者  
摧將除河洛之腥膻載見乾坤之日月凡茲有民有社



實惟同德同心不食哭秦廷期盡包胥之義左袒為劉氏共推周勃之忠勿為守窟之謀當作輔車之勢警急捷邊烽之報傳聲嚴羽檄之馳俾鼠竊而狗偷若獸蒐而禽獮至於京洛義士趙代奇才見無禮於其君盡昌言於爾衆審其逆順以為從違或斬首以迎降或據城而來獻事功苟就富貴可圖怒豈止於冲冠勇侯聞於投袂獵狁孔熾我是急擬成敵愾之功匈奴不滅何家為各效委身之智機不可失時豈再來用胥告於同盟



俾咸知於此意急如律令拱聽指揮

按唐顏師古注漢黃門令史游急就篇檄以木為之  
長尺二寸有急加鳥羽古所謂文告之辭是也戰國  
張儀為檄以告楚相厥後司長相如作檄喻蜀陳琳為  
袁紹檄豫州其名特著然未有四六之文至隋唐始  
有之宋置宏詞科散立儷語不拘定制故周益公擬  
漢河西大將軍諭隗囂倪正父擬晉奮威將軍諭中  
原豪傑皆用四六盖取其聲韻諧叶便讀而易聽故



也其詞貴乎奮發使三軍懷忠勇之心寇盜有喪亡之慮始為得之不然抽黃對白將焉用哉予讀唐書安祿山反何千秋勸顏杲卿傳檄趙魏斷燕薊要膺杲卿從之河北諸郡響應者凡十七郡得兵二十餘萬是豈非人心感應之機乎豈當時文告之及有以動之耶使幸而成功明皇豈至於幸蜀乎常山之敗顏氏死者三十餘人其得禍亦不細矣然河朔諸郡所以決逆順曲直之理而為去就從違之計者實皆



杲卿有以發之是豈可以成敗論哉唐之所以為唐者實兆於是矣因擬顏杲卿告河北諸郡檄一篇雖不足以發明忠臣之心亦足以見公論之有在云

露布

擬梁王僧辨平侯景露布

尚書令大都督臣王僧辨等臣某聞成周大法聿嚴九伐之誅漢室龍興爰正三臣之戮方嗣聖紹无疆之歷而逆亮當極惡之刑肆告成功聿章大孝恭惟皇帝陛



下慈愛恭儉果毅仁強有經文緯武之資慨遺大投艱  
之會當饋興嘆副四海戴日之心嘗胆卧薪當二聖在  
天之憤睠茲克逆寧後誅夷侯景窮狗微生犬羊遺孽  
托身高氏盡忘羽翼之恩逃命宇文復作叛亡之計我  
高祖武皇帝仁同一視道合三無謂其慕義而來歸或  
可革心而易面獼猴出穴未膺狙使之勞飛鳥依人遽  
有鷹揚之志假息壽陽之境簸揚江上之波烽火接於  
秦淮戈刃交於畿甸塗炭黔庶腥穢冠裳圍逼臺城屢



動宵衣之警震驚宮闕俄成晏駕之悲簡文皇帝事重  
宅憂親遭降割志每慙於靖難恩尤切於好生隆爵重  
封用廣包容之量窮兇極惡曾無悛改之心廢置等於  
奕棊弁髦視如土梗卜齷挾刃本諸慶父之謀成季抽  
戈直指馬昭之罪是宜為君而效死可能與賊以俱生  
某等受寄齋壇謬膺將職始留巴陵之戍任約就擒薦  
揚漢口之威化仁請縛子仙棄郢城而身為俘馘于廣  
棄郭然而功在遁逃役不厭時仕有餘力舳艫數百里駭



動鯨鯢鼓輦億萬兵威稜虎豹爰振潯陽之旅薦成姑  
孰之勲顧死灰之復然慮困獸之猶聞石頭城列柵命  
霸先往扼其衝招提寺進師俾王琳獨當其銳應機而  
潰奮臂大呼傾城無匹馬之還債轍淖雙輪之返元惡  
竄身而入海黨與稽首而來庭肆發命以窮追不渝期  
而克獲食彭越之醢頃刻無餘燃董卓之臍光明達旦  
載復三吳之舊遂驅九軌之塵江漢朝宗山河改色茲  
蓋仁聖不殺威武布昭運奇堂上之兵制勝目中之虜



赫怒而安天下誰其禦之遄歸以正故都惟其時矣臣  
某等恭承廟筭忝與行間乘六龍以馭天願返翠華之  
仗衛掩七戎而得駿敢忘鐵汗之驅馳臣某等不勝慶  
快之至謹差某官姓某露布以聞軍資器械別列條上

某年某月某日具官某

上

按露布之名始於漢史稱露布天下露布上書上下  
皆通用之不專於將帥也後魏攻戰克捷欲天下聞  
知乃書布帛建於漆竿上名為露布後世因之故王



肅獲賊二三皆為露布宋制詞學科露布為十二體之一軍興則以命題就試之士以所業二篇併其餘上之中書後省考其能者然後召試中者授以館職俗謂選定兩制其法顧不嚴而重于世運代更趨舍異向學士大夫習之者少矣夫一物不知儒者所恥今軍務煩興捷書交奏文學之士將執筆於戎旂之中以傳檄四方如有用我則何以哉予讀王元之小畜集有擬李靖平突厥露布實為擬題之始其詞雄



壯奮發心竊慕之及閱通鑑紀事載侯景之亂而知  
元帝之在湘邸所以命將出師以復讐雪恥者厥功  
大矣乃以王僧辨平侯景露布為題非敢以為文也  
所以自別於飽食無所用心者云

內制

擬賜四川省臣臘藥口宣

勅某等朕惟井絡之墟擅藩翰之固虎符龍節式昭輔  
相之光翠管銀罌爰輟上方之御欽予德意咻爾寒饑



擬賜和林帥臣臘藥口宣

勅某等任職西郵馳心北闕念承徵之行役式謹秋防  
獎行葦之忠勤敷時臘賜咨爾連營之旅變為挾纘之  
和

擬賜上都帥臣臘藥口宣

勅某等職分朔漠名著封疆雪窖冰天想歲寒之欲暮  
寶匳珍劑敷陽澤以如春俾爾連營有如挾纘

擬賜淮南省臣臘藥口宣



勅某卿高相業任寄戎昭積雪堅冰慨三冬之凜冽長  
江廣漢想萬里以安流實上劑於珍奩布陽和於玉帳  
擬撫問總兵官兼賜臘藥口宣

勅某卿位隆上相望重元戎江湯湯武洸洸已集安流  
之績陣堂堂旗正正大收克捷之功瞻言臘序之臨凜  
有風寒之警珍劑布陽和之澤言錫予之金戈奏雪夜  
之勲維其時矣

臘藥之賜肇自唐制少陵杜氏所謂口脂面藥



是也宋時品劑歲各不同俟修合稟議大抵冬  
用溫夏用涼適於烹調服用而不失其宜者也  
其賜予之詞則以付之詞臣翰林直者文武臣僚  
既受賜各上表稱謝故近世有詠翰林故事者  
有曰因念邊庭風雪苦口宣臘藥布皇威然則  
君臣上下之間恩禮之隆可見矣臘日將臨有  
懷舊制擬口宣數篇誠不敢仿古人之萬一姑  
以見古學之所當務云



擬撫問省臣及賜夏藥口宣

勅時惟六月用撫三軍我心憚暑憂如熏永言蒸鬱王  
事多艱維其棘深念勤勞賜頒藥品之良用迪師中之  
吉汎威聲而除氛沴國底丕平扇暑暍以為清涼民躋  
仁壽

擬撫問浙東分省臣僚及賜銀合服藥口宣

勅赤日被海東土深軫炎歎涼風在殿西頭誕施恩賜  
肆出上池之劑有嘉靖海之功扇為清涼躋彼仁壽



擬撫問湖南總兵省臣及賜銀合夏藥口宣

朕觀虞廷阜財之詩誦唐殿微涼之詠恩私所及與往古以同心炎暑有行慨多艱之維棘爰錫衛生之劑用臻在道之安

擬撫問雲南省臣及賜銀合夏藥口宣

六月維時三庚云伏念宮宇邃嚴之地有若煖焚居山微炎瘴之鄉曷勝蒸鬱爰賜實匱之劑永懷留鑰之英

古天子錫命諸侯有命物有命詞有命物命詞



者若後世以璽書賞功臣增秩賜金是也止有  
命詞者若後世賜手詔褒美是也然則撫問臣  
僚及藥餌之賜其亦古天子錫命之遺意歟夫  
藥劑所以衛生者也人主之於下以時而錫予  
之所以使之盡調護之宜以盡性命之正者無  
所不至矣當時之臣或不能盡忠以報上者何  
哉嗚呼此君臣之分所以益不明歟予觀宋內  
相辭命之作常欲一摹倣之伏日斯臨以舊制



擬賜夏樂口宣錄之於此用見志之所在古

學云

擬賜江淞省龍衣御酒勅書

勅某等卿乃心王室服勞藩宣眷言海表之勲爰錫上方之御龍光有耀式昭衮黼之榮蟻味其馨樂豈樽罍之晏不惟其物曷樹乃勲

擬賜江淞省臣名馬勅書

勅某等卿職任藩宣功成駕馭龍韜豹畧永言靖難之



功霧鬚風駿爰錫調良之乘雖非千金之貴庶資萬騎之多尚策奇勲益昭大賚

擬賜荆東憲臣御酒勅書

勅某等卿肅臨憲部慎守王綱眷言勞瘁之多宜有醇醴之賜樽壘多旨盍思湛露之恩繡斧光華尚廣沛霄之渥懋勤耳目用寄腹心

古之王者錫予羣臣必有其辭若所謂勅書口宣者是也予觀唐宋以來詞臣內制之作不啻



千百其詞溫厚和平惻怛慈愛殆與三代誥命  
相為表裏國家有道之長實係於此學者可不  
之務乎近世士大夫嘗以館閣之文非山林士  
所克為噫何其識量之淺淺哉夫士之為學將  
行道濟時立言垂世也代言典誥特文章一技  
之施爾果足以盡士之用哉若夫運之窮達時  
之用舍固有幸不幸者爾歲暮天寒懷不能已  
因撫今事為勅書三篇用貽同志云



擬故宋太師徽國公朱熹改封齊國公制

皇天開太極誕生不世之賢聖代昌斯文丕展非常之  
禮煥揚典冊式慰明靈故宋太師徽國公朱某淵密而  
精微光明而雄偉正心誠意之學經邦緯國之才道統  
集大成契帝王心傳之要名教非小補會聖賢旨趣之  
歸慨彼何人斥其為偽雖乃身不容朝廷之上而大名  
終垂宇宙之間朕紹嗣丕基寤懷前哲惟家傳人誦具  
有成書而目注心存凜焉遺範念闕里既稱於殊號何



邦爵未及於更封乃睽青齊密聯洙泗龍章輝壁煥綸  
綍以維新袞冕植主肅容襟之如在祀列十人之配諡  
仍一字之尊嗚呼巨儒想南渡之英實惟氣運上公昨  
東表之畧非示恩榮尚惟道德之光克相熙雍之治

真在至正間朝廷改封晦庵先生為齊國公  
擬贊書一通置諸塵笥有年矣際今盛朝而公  
之五世孫名斡字明仲謫居潁上縣長禮致諸  
學訓導弟子負真未及識面而以詩見教大賢



子孫所以待人者如此其厚耶因次韻以復且  
錄贊書舊藁以求正云

明仲得此文甚為稱羨作詩以寄比之靜軒閣  
公且求著光祿公墓銘真懼不敢當也後明仲  
來濠梁言此文恨不得之於館閣上蓋請封時  
詞頭雲林危公執筆以為詞意不備心嘗歎然  
異日歸閩當傳之家牒以壽不朽明仲卒於潁  
上真所書遂歸之徐景顏景顏太末人為潁上



教諭真同年進士也

擬起復江淝參知政事制

帷幄之籌千里允屬全材縑墨之服三年寧從終制蓋  
君子有斷恩之義在先王存變禮之文睠我輔臣奄違  
慈養丕俟修攘之績用昭起復之儀某料敵精明臨機  
英果兵書明四種應變無窮將畧盡五材當鋒必克粵  
從早歲已冠前軍斬克逆如枯管履險危若平地是父  
必有是子曰武曰文事親而及事君以忠以孝薦屬膚



公之奏晉登近弼之聯樓舡百萬艘悉資運棹貔虎三千士咸聽指揮肆令疆土之安屹若丘山之重凡省閭折衝之略皆家庭教誨之餘期贊協於鈞衡忽傳悲於風木朕念艱難之會孰寬憂顧之懷今北道未通南風猶競諜報赭巾之聚郵傳白羽之馳草熟馬肥天寒地凜內患未遑於靖輯外攘曷底於乂寧念將同社稷之憂其可久閨門之戚是用載參政柄申督戎昭淞左四明謹腹心之備禦海東萬里連唇齒之相依申城守之



捍防登京畿之漕運任當一面式固中權嗚呼想高橋  
青野之師盍從形勝振留畝中鄉之旅宜大家聲佇聞  
執訊獲醜之功以大行賞褒封之典朕言不再汝往欽  
哉

擬加封梓潼帝君制

文明以化天下置惟輔佐之功誠敬可格神靈盍舉疏  
封之典渙揚寵號益闡恩光蜀七曲山文昌宮梓潼帝  
君井絡精英山川間氣雲車風馬每為人間世之遊瑤



宇琳宮遂闢道家流之祕肆我家之聿造藹多士之思  
皇科目誕頒有赫陰靈之佑馨香旁達居然盱衡之通  
預定名於計偕用作成於善類休聲有烈治道是裨騰  
惟天極之尊允鑠文昌之座增加貴飾式表隆稱冠裳  
晬穆於儀容鍾鼓具嚴於格享嗚呼禮樂千齡之運相  
我斯文人民百世之依錫茲純嘏可加封輔元開化文  
昌司祿宏仁帝君

予年弱冠時用意兩制學唐宋諸名家贊書多能成



誦及閱鄉先生內翰厚齋王公詞學指南及掖垣玉  
堂類藁益能深究制作之體忝以科名主中都教職  
為閣筆久之人有以元延祐三年加封梓潼帝君制  
書見示者詞意溫雅得代言體因細錄如左別擬一  
通不敢比古作者姑以見志之所存云按神祠封制  
在唐宋時中書舍人行元時中書舍人不置書贊皆  
入翰林學古之士必能深辨之

制曰維明有禮樂維幽有鬼神妙顯微之一貫在天



為星辰在地為河岳形功用於兩間矧能陰騭於大  
猷必有對揚之懋典具神光分張宿發詠周詩相予  
泰運則以忠孝而左右斯民柄我坤文則以科名而  
選造多士每禦揀於菑患彰感應於勸懲貢舉之令  
再頒考察之籍先定賁飾雖加於渙汗徽稱未究於  
朕心嗚呼予欲人才輩出爾丕炳江漢之靈予欲文  
治宣昭爾濬發奎壁之府庶臻嘉貺以答寵光 此  
習宋唐舊製但以長聯當短句恐於聲律不協姑附



於此與識者評之文不著姓氏當考

擬追封伯夷叔齊制


昆季是謂至親德高義讓國家緬思先哲禮重尊崇  
惟二子之賢實起百王之慕伯夷叔齊具清者之量有  
仁人之心上從父命之尊次及天倫之重棄國而辭冠  
冕敝屣孤竹之封叩馬以諫干戈沒齒首陽之節歎神  
農虞夏之盛與泰伯吳雍並稱遺廟歸然空山精英藹  
如元氣彼義不食粟榮名何累於生前雖諡以易名好



爵寧縻於死後朕纂承大業深沐休風用敷賁於雲章  
俾有光於巖谷天理人心之正日篤不忘朝廷祀典之  
宜庶幾克享尚期激勸不昧欽承可追封伯夷為昭義  
清惠公叔齊為崇讓仁惠公

予近讀元姚文公燧著伯夷叔齊制愛其命意  
高古遣辭精當足為不朽之傳輒倣其體而為  
辭云洪武十八年六月一日也





蒙陽外史集卷五十七



欽定四庫全書

榮陽外史集卷五十八

明 鄭真 撰

闕



滎陽外史集卷五十八



欽定四庫全書

滎陽外史集卷五十九

明鄭真撰

闕



榮陽外史集卷五十九



欽定四庫全書

集部

紫陽外史集卷

六十五  
六十三

詳校官編修<sub>臣</sub>程槐

中書<sub>臣</sub>劉源溥覆勘

總校<sub>臣</sub>陸調編修<sub>臣</sub>倉聖脉

校對官編修<sub>臣</sub>沈清藻

謄錄監生<sub>臣</sub>劉澹



欽定四庫全書

滎陽外史集卷六十

明 鄭真 撰

表

高祖武德元年萬年縣法曹孫伏玘謝除治書侍

御史表

伏以顯賢任能誕著聖明之治瞽言狂直曷庸忠蓋之  
求恩綸上過於堯言束帛有加于周賚循牆莫避伏地



知慙中謝竊惟自古之用人惟待諍臣而加禮蓋於舉繆

繩愆之任責以論思獻納之才匪具股肱何宜耳目如  
臣某者性資鄙賤學術荒疎后非賢不久訓戒敢違於  
天子邦有道如矢幽獨常凜乎聖明敬當真主之龍飛  
欣幸清時之燕喜每懷愚慮更切周咨爰陳經久之規  
永示將來之矩矱分牧已依日月之光臺閣高升普徧  
雲天之澤何以有裨於聖治將期永固於基圖俯仰懷慙  
周章就列恭惟皇帝陛下聖姿神武天性聰明歷數有



歸禪授實同於有夏民心樂戴政刑盡革於亡隋尚為  
邪佞之防用審忠賢之得言思逆耳事在利行臣某敢  
不思報隆知勉肩所職惟忠可以事上敢接武於夔龍  
非道不敢陳前願致君於堯舜

同前題

伏以治隆聖運誕昭宸極之光任重憲綱增賁臺端之  
秩撫躬不稱拜手知榮

中謝

竊惟人才之盛衰嘗係世道

之輕重非有明目張膽俾山嶽之動搖何以弭患消奸



致邦家之平治允念股肱之任咸惟耳目之臣若稽  
猷猷夙聞往昔烏臺柏府聲凜凜以生風駟馬鐵冠止  
行行而避路故得敢言之士庶為司憲之官伏念臣某  
才不逮人學非聞道自分簿書之末不離刀筆之中幸  
蒙真主之勃興普與斯民而更始奮心自厲克志有為  
爰陳三事之敗亡以為今來之勸戒冕旒清穆方瞻北  
闕之華冠豸巍哉遽拜南床之擢循牆莫避臨谷惟兢  
恭惟皇帝陛下緯武經文撥亂返正天戈所指廣揚震



動之威日御時乘大啓離明之運致茲孱瑣服此休嘉  
龍鳳文章寵及便蕃之命鵷鸞造羽榮隨侍從之班用  
來寥寥之忠期盡惓惓之益輝光分荷報稱至難臣某  
敢不思厲忠規煥揚風采以商周為鑒願益宏社稷之  
基非堯舜不陳其敢後人臣之義謹奉表稱謝以聞

武德四年秦王謝除天策上將軍表

伏以愛始家邦誕厚親親之義禮登策府備隆將將之  
權拜命惟榮撫躬以惕中謝臣某恩隆慈育教服義方



性靡習于溫文才不全於韜畧早逢聖運躬履戎行仰承睿算之無遺上稟廟謨之全定正正之旗堂堂之陣則莫敢承赫赫厥聲濯濯厥靈有征無戰一洗闕河之壯觀盡除宗廟之妖氛皆聖武之布昭豈臣微之能致敢冀非常之賞以須希有之榮苴土分茅既侈裂封之盛齋壇建閭又加崇拜之榮位長王侯寵深君父有倬龍飛之造於昭燕翼之謀恭惟皇帝陛下篤敎彞倫任隆肺腑綿本支于百世衍祚嗣于萬年緯武經文建邦



樹屏念周封同姓務崇列國之名謂晉爵諸王亦冠督  
軍之任肆加時禮式表隆名左右旌旌總萬屯之森衛  
出入幃幄收四海之俊髦密聯玉闕之華輝映金枝之  
秀遭逢侈矣報稱謂何某敢不誕承明威紹膺景命刑  
賞懋明於天道修攘期布於王靈夙夜基宥殫厥心用  
贊協恭之妙國家閒暇明其政預嚴思患之防

太宗貞觀十七年魏徵謝賜殿材素屏風素褥几

杖表



伏以內廷錫寵誕昭三接之榮秘殿賜材爰及多儀之  
備感恩以惕拜命惟榮中謝念某昏耄餘生卑棲無用  
志業恐隳於堂構行藏每慎於興居取規矩以為方圓  
匪有成物之智徹桑土而葺戶牖夙無備患之材屬當  
四海以為家欣幸一人之有慶天開雲母會同日近於  
清光坐列氍毹宴賜俯同於前席匪有藉依憑之寵庶  
幾防傾跌之虞惟桑榆漸迫於衰頽而繩甕不忘於貧  
賤報颺莫稱寢食靡遑指事詳陳囊一封而晉奏拜恩



舄奕萃衆美以鼎來松出徂徠栢來新甫刀踞靡辭于  
斷削文尋紛就於謀為屏褥爛皓素之光輝几杖妙曲  
繆之形制于以棲塵而鄣日于焉扶老以養和植其庭  
覺其楹言居言處瞻爾前顧爾後以翼以扶寵冠簪紳  
輝生門戶恭惟皇帝陛下明明天日之表巍巍龍鳳之  
姿從諫如轉圜用人猶不及處身以儉極土階茅茨之  
心養老以誠盛廣廈細糲之奉致茲衰朽亦與恩光臣某  
敢不思盡謀為恪遵程度物其多矣適居寢動靜之宜



厚莫重焉盡骨肉死生之報

貞觀四年張蘊古獻大寶箴表

伏以聖人大寶曰位治亂實係於怠勤臣子責難為恭  
職業敢忘於箴儆俯殫悃悞仰徹宸聽某竊聞成湯君  
臨萬方式謹盤銘之戒衛公年逾九表不忘抑戒之辭  
蓋人君居四海之尊以天下奉一己之欲自非動觀默  
省保厥祚之惟艱何以持盈守成垂洪猷於久遠恭惟  
上聖遠冠前王方九重垂御之初寶萬方臨照之始雖



盛德不忘於兢業而嘉猷必致其忠規用殫聞見之愚  
上瀆高明之聽恭惟皇帝陛下明明天日之表巍巍龍  
鳳之姿乃聖乃神恢漢高之大度有嚴有翼用文王之  
小心瞻後慮前慎終惟始凡而德業皆本生知永惟日  
月之明尚採蒨蕘之論聲為律身為度式禮無愆天之  
經地之寧與民同慶旦以復旦新以致新臣某幸服下  
僚親逢嘉運常厥德保厥位益恢王業之隆竭其力致  
其身務盡臣隣之益



貞觀十三年房玄齡請解機務表

伏以尊居廊廟豈勝告老之心望動山林願遂投閒之  
想謹裁觚牘仰瀆宸旒

中謝

竊以天生不世出之興王時

則有非常之哲輔伊尹咸有一德心腹同乎傳說命總  
百官精神夙契茲所謂風雲之遇用能成霖雨之功豈  
此謏材久持魁柄伏念臣某夙由下士獲際明君選除  
遍歷于高華僥倖夙膺於揀擢爰由吏部遂總中書位  
居冢宰之尊任處天下之重體陰陽造化有愧和調錫



山川土田屢叨恩數自慮股肱之墮乃承體貌之隆既  
忝國姻復居儲傅惟素餐之益甚思洪造之難酬願解  
繁機少安愚分恭惟皇帝陛下天姿勤儉聖度恢弘乘  
雲氣而御飛龍官天下而府寰海舉相十六幸觀熙載  
之能有臣三千咸得和衷之助茲惟庸菲久處弼諧每  
懷陳力之言敢員知止之義伏望俯加垂照曲賜保全  
別援真賢俾獨當於鈞軸庶幾晚節願終老于桑榆

貞觀七年魏徵謝賜金甌表



伏以金馬高嚴寵承諏訪甕鷄微賤謬極恩榮拜首承  
休捫心增惕中謝伏念某鈍頑之質陶冶之姿久負孤忠

匪堅剛之百鍊蚤承錫用屬器使於羣工上陪日月之  
光下獻蕩蕩之議但思粉骨豈敢愛身不圖天陞之優  
容復拜內廷之寵賜光華璀璨堪承玉露之灑灑形質  
空虛似映器車之煜煜豈遠來於異國抑近出於諸山  
度彼瓶罌姿非瓊璧是將廣開於言路故茲特發於宸  
衷茲蓋伏遇皇帝陛下天性聰明聖度豁達謂言辭蹇



直可為有國之裨故詔旨都俞爰輟尚方之御輝生牖  
戶銘徹肺肝臣某敢不祇誦堯言服膺周賚中正不倚  
非但如周官醢醢之供恢廓有容其敢為漢陰抱灌之  
具

貞觀七年十二月帝奉太上皇置酒未央宮羣臣  
賀上表

伏以堯父舜子赫焉日月之重輝文德武功盛矣樽壘  
之展慶事隆宗社榮被縉紳中謝竊以人倫無過於尊親



君德莫隆於授受故有周文而為子恒修寢問之恭有漢  
祖以作君必展躬朝之禮致敷天之養洽率土之心欣  
幸昌朝光輝前古恭惟皇帝陛下小心寅畏大孝率由爰  
篤順于親心以為法于天下禮勤侍奉顧豈以四海九  
州而自居壽祝康寧將底於萬有千歲而未艾躬循至  
行面奉嚴顏鼎新內殿之隆萃列綺筵之侈蠻夷舞蹈  
朝野謠呼臣某等榮與造庭寵慚錫類親其親而為大  
道觀孝治之恢崇老吾老以及人式見民彛之棗迪



太宗貞觀六年上宴近臣於丹霄殿羣臣謝表

伏以鏘金曳玉躡升內殿之華設几肆筵叨侍天厨之  
美榮加口體恩徹肺肝

中謝

竊觀虞夏以來莫過姬周

之盛鹿鳴魚麗傳播聲詩天保露斯光華簡冊久仰前  
朝之盛適逢昭代之隆顧為何人亦與斯禮竊念臣  
某等學非聞道用不適時曩因龍虎之從遂見鯨鯢之  
殄天戈所指嘗奉命以周旋日馭時臨每承顏而啓迪  
自分草茅之陋曷承座席之懽鼓瑟吹笙盛矣鈞天之



奏重茵列鼎燦兮御府之珍深愧素餐莫酬洪造恭  
惟皇帝陛下明明天日之表巍巍龍鳳之姿達天道順  
人情功茂成于化育偃武功修文德效丕著於隆平台  
衡推心腹之同臺閣叶股肱之契寵加晏賚事絕嫌疑  
蕩蕩無名欣欣喜色快睹儀容之盛各沾雨露之恩念已  
屬饜尚圖報稱醉以酒飽以德福祿永期于萬年竭其  
力致其身恩數敢忘於他日

貞觀十七年魏徵謝賜殿材表



伏以聖德寬容誕布雲天之澤臣心仰戴旋成風雨之

居寵自龍庭光生蝸室

中謝

臣某桑繩鄙賤草芥寒微

取規矩以為方員匪有成物之智徹桑土而葺牖戶曾  
無備患之才屬當四海以為家深仰一人之有慶上廟堂  
而建議用終儼於棟梁立殿陛以颺言功有懃於柱石  
頃負採薪之疾已承予告之恩僭上囊封喜垂淵聽且

輟閣



知之厚共誇工用之全恭惟皇帝陛下道過唐虞功高  
湯武守身以儉極土堦茅屋之心待士以誠盛廣廈細  
糲之養致茲衰朽獲與光榮臣某慚已非宜感恩曲被  
勉就經營之力思為嗣續之基大為楠小為桷舉不違  
於程度矢斯棘鳥斯翼當永遂於居安

貞觀七年李淳風上黃道儀表

伏以治厯明時式謹玉衡之度法天成象肇新黃道之  
儀俯竭愚衷仰干宸聽

中謝

竊惟陰陽之動靜實由形氣



之附依二曜流行謹進退虧盈之異四時迭運明分至  
啓閉之殊惟造化之無窮妙機緘之不測自非制器尚象  
何以考順求違恭際昌辰聿新盛觀乃眷渾天之創俾  
殫薄技之陳布鼇足以為維表嵩高而作準明兩道與  
六合挈三辰與四游星辨緯經合重環而表裡極分南  
北貫二道以橫縱刻雕不棄於毫釐占步靡違於頃刻  
共上清臺之邃用昭盛代之傳恭惟皇帝陛下德茂生  
成道隆高厚誠心昭格按星土以辨方和氣薰蒸時雨



賜而利物肇成乾象以正坤隅用能三百六十度之中  
高視萬億百千年之上惟帝其訓與時偕行臣某生屬  
熙朝職專太史密測璿璣之運輔成玉燭之和欽天道  
而迓禎祥願致雍熙之治察人為而明事應敢言職掌  
之功

貞觀十四年李淳風議戊寅厯表

伏以聖主握乾符誕著體元之治太史占天象庸修治  
厯之功俯竭愚忱仰干宸聽中謝竊以容成之總六術上



元起辛鄧平之造太初南至在朔盖順時而作事宜以  
人而合天苟或差殊豈勝繆戾既無以成作訛成易之  
序亦安能遂陰陽寒暑之宜當重熙累洽之辰致長治  
久安之效宜謹穗書之課以昭黨厯之傳睠茲貞觀之  
頒行肇自戊寅之撰述傳承久矣得失昭然盖月應於  
黃鍾而灰飛于玉琯實在甲子之朔是為日至之辰何  
定法之微差由減餘之或過以癸亥為朔既成三刻之  
乖則時月表年何為萬世之法肆令考定永示傳承歲



改度以維新時致和而叶應恭惟皇帝陛下神遊泰運  
德並乾元齊七政以釐百工密應璣衡之運建皇極而  
錫五福茂調玉燭之和惟茲晷刻之違將致天正之舛  
睿謨夙定永式庸陳改憲三百年惟帝其訓登化億萬禩  
與時並行妙合成恩施化育臣某繆持螽測識愧管  
窺由損益進退之方契轉運流行之妙官不失日導迎  
滋至之休民用厚生共迓重熙之運

貞觀十三年林邑進火珠表



伏以聖神臨御合璧交輝山海儲精名珠獻寶式謹拾  
懷之義庸修贊奉之勤中謝竊惟大德之難名斯致奇珍  
之間出故軒轅出世符罔象赤水之求少昊應期致丹  
鳳白雲之異久矣休禎之象昭哉圖讖之傳幸值昌期  
迥超前古洋洋聲教不遺窮陋之區赫赫文明遠被要  
荒之服致天地之美寶合國家以同庥磊落晶熒上應  
北極之座渾融瑩潔祕奪太陽之精豈同螺蚌之懷寶  
出驪龍之領當曜靈之洞照感氣類以旁通漸揚就燥



之光式謹燎原之義固無資于烜氏亦何待于燧人誠  
不偶然厥有致者恭惟皇帝陛下德符乾健運合離明  
念微矚之然或有裨于至化而夜光所照曾何掩於羣  
情肆令徑寸之珍亦產遐方之遠函封以致于以用之  
剖身而藏非所願也仰止堯階之邃恪修禹貢之常臣  
某佩德惟深銜恩莫報論人間之價敢擬連城依天上  
之光願言照乘

貞觀十四年吏部侍郎高季輔謝賜金背鏡表



伏以天光下燭誕昭寶鑑之明聖澤旁流寵錫珍奩之

御輝生門戶銘徹肺肝

中謝

竊念臣某質本鈍頑性尤昏

蔽幸致功名之會遂叨法從之華監於水當于人義素  
聞于周誥瞻爾前慮爾後言有取于丹歲上承止極之  
尊下重南宮之寄思皇多士實司綜核之權蒞事惟能  
宜重銓衡之任示無私于黜陟用有別于正邪匪著功  
勲乃承獎賚麗水有資于人造容成夙儼於侯封皎潔  
清寒不數方諸之薦熒煌灼爛何殊火齊之珍稽首拜



嘉撫躬知媿茲蓋伏遇皇帝陛下法天成象因物賦形  
謂秦鏡徒明莫照李斯之惡而殷鑑不遠可懲夏后之  
衰俯憐孤陋之資申錫圓明之器龍盤鳳舞於惟百鍊  
之精英日晶月華可燭千年之幽隱縉紳動色罔象潛  
蹤臣某敢不拂拭塵蒙磨礪職業鑑形俱在永為模範  
之資鑷髮未斑終賴化鈞之造

貞觀二十一年太子左庶子于志寧謝賜金帛表  
伏以輔翼參陪無補青宮之毓德陶鎔衣被猥承丹陛之流



恩聿開忠諫之途益廣元良之輔自天拜命俯地知慚

中謝竊

以麗水所生必資爐冶鮫人所織尤藉繭絲粵若古先  
視為珍貴燕臺待士嘗來樂毅之雄漢室徵賢曾屈申  
公之重夫何近侍亦忝恩榮伏念某頑鈍微妄輕纖弱  
質貞心自守每媿莫夜之四知隱德無聞敢冀丘園之  
一束幸屬風雲之會獲依日月之光儲禁華開使輸忠  
于左右宸嚴寵賁俾佩服於光華既踰三品之良且倍  
百縑之數若為報稱但切凌兢茲蓋伏遇皇帝陛下德



邁湯文道高堯舜分金以贖饑人之子允矣慈仁散帛  
以收亡卒之骸淵乎忠厚念儲副國本之所在必正人  
端士之與居致此寒微優加崇寵臣敢不力為負重思  
展所長底商家作礪之功敬祇休命體周雅承筐之詠  
思啓周行

貞觀十四年祭酒孔穎達上五經正義表

伏以萬國文明久仰緝熙之學五經簡奧曷彰訓詁之  
功用輯前言敬陳睿覽

中謝

竊以易言卜筮紀卦爻辭象



之文書載典謨盡政事謀猷之要禮總言乎大小詩遍採於歌謠至若魯史之春秋實出聖人之筆削尊王抑伯允著綱常內夏外夷具嚴界限浩矣文辭之盛淵乎旨趣之深睠此羣書實為大訓蓋非但人君致治之本抑且為下學立心之基更秦氏亂亡以來不勝灰燼迨漢儒補綴之後僅免遺亡且論說之紛然于指歸之何在百家裒集宜明去取之公萬理同歸當著是非之正用有殫於絢素期不朽於汗青恭惟皇帝陛下義畫心



傳禹謨天授北辰示極藹聲歌典制之華南面居尊褒  
褒貶賞罰之正詢謀而宏教化制作以闡人文念師說之  
多端恐經傳之益舛遂令微藐獲在討論臣某俯愧非  
才仰叨成命用進冕旒之側敢修鉛槧之功願乞清閒  
微加省覽俾聖賢可法遂明道統之傳以帝王為師誕  
著治功之盛

貞觀三年以房玄齡為左僕射杜如晦為右僕射  
魏徵為祕書監參預朝政房玄齡等謝表



伏以台司奎府務得真材紫誥泥封忽叨威命加賁三  
臣之寵竄為千載之逢中謝竊觀隆古以來唯以得人為

盛舜咨四岳聿觀熙載之能武有十人舉得同心之助  
乃如今日有光前猷念某等生遇明時行躋膺仕乃輔  
乃弼有非克舜之道則不敢以陳斯謀斯猷將使帝王  
之法坦然可舉既使顯膺于近密復令偏厯于清華燮  
理化權丕驗上階之象參聞政體絜為東璧之光咸愧  
非才冒叨恩數有負乾坤之造莫裨日月之明恭惟皇



帝陛下龍鳳之姿天日之表求賢若不及從諫如轉圜  
五百餘年生聖人誕膺帝命二十大功為天子用普王明  
念治效惟在于同寅而揆職匪堪于獨任故茲臣等簡  
自上心臣某等敢不祇奉明謨力圖成效贊襄出納當  
有補于鈞衡啓迪謀為豈徒專于圖籍

貞觀十一年隋秘書監晉陵劉子翼辭徵表

伏以皇華八里忽承王命之臨白首在堂將就親年之

養俯彈悃悃仰瀆威嚴

中謝

竊念臣某樸樾微材草茅賤



迹上觀堯典心遠慕於夔龍仰止孔門行欲期于曾閔  
早由窮巷逮仕亡隋躡升冠冕之班猥入圖書之府恪  
共所職惟炳焉丹炯炯之心謝事而歸嘆老矣白蕭蕭  
之髮自分甘于肥遯寧有事於徵求四牡先生于原隰  
束帛寵賁于丘園揆此疎慵若為報稱固宜朝夕就道  
少寬稽緩之誅亦使風雨在途尚遂焦勞之想奈此旨  
甘之奉方當喜懼之年苟使睽離必疎定省念事母之  
日短豈勝菽水之供于報國之時長何憾桑榆之晚所



願永終于色養遂茲上瀆於威顏恭惟皇帝陛下龍鳳之姿天日之表御至尊而制六合野無遺賢褒有德而懷萬方朝多君子顧茲草芥亦辱蒲輪臣某半世顛愚餘生假息類作棲鳥低飛之態長懷慈烏反哺之情敢乞聖恩少從臣欲邦有道不廢既幸遇于明時臣以孝作忠敢自期于他日

貞觀二十年李道裕謝除刑部侍郎表

伏以刑曹劇部貳職匪輕法從真除參陪甚寵出綽靡



回于成渙循牆莫避於忱辭

中謝

伏念某才不逮人學非

聞道子路片言折獄嘗聞孔子之言伯夷折民惟刑深仰  
帝堯之世固嘗志前賢之學庶以希往古之蹤既此志  
之未酬幸孤忠之自信九重天近獲依日月之光六位時  
乘幸屬風雲之會既寵承於榮耀復玷辱于清華嘗因  
少見之明粗盡不欺之義敢希簡擢復被遷除秩次秋  
卿又拜恩綸之渥名符司臬遂叨曳履之榮近陪常伯  
之聯上綴文昌之座感恩特甚慙已非宜恭惟皇帝陛下



下堯舜寬仁禹湯勤儉赦彼有罪悉為復業之民期於  
無刑丕致可封之俗恩實深于厚下德茂洽于好生特  
俾臣微與司政柄臣某敢不勉供所職思報隆知奉法  
令之嚴敢司輕重體仁慈之意務在平和

貞觀六年秘書少監虞世南上聖德表

伏以聖德如天誕著形容之寔臣心就日用揚治化之  
休仰荷情深披彈語短敬陳冕旒之邃敢言詞翰之勤  
竊觀隆古之君必得文章之士聲歌揚厲用觀有道之



長簡冊敷陳允著無窮之載洋洋盈耳炳炳如丹上考  
典謨史臣贊唐虞之盛德旁觀雅頌詩人歌文武之成  
功於赫皇明丕昭景命北辰示極尊受萬國之朝南面  
垂衣統正億年之緒非紀見聞之著曷揚論議之公念  
大呂黃鐘固無庸於瓦缶然九重丹陛宜有取於薊薳  
冒貢穹窿切慚骹骹恭惟皇帝陛下明明天日之表巍  
巍龍鳳之姿修文德偃武功光赫陽明而燭物赦囚徒  
出怨女沛仁澤以如天禮篤尊親恩深逮下分金以贖



饑人之子散帛以收亡卒之骸尊禮大臣有漢高之度  
保全勲舊有光武之仁丕致隆平擴充大道且檢身如  
不及復從諫以如流田野無失業之民間里多可封之  
俗蓋將四三王而同盛六五帝以匹休盛矣勲名昭哉德業爰  
極鋪張之妙不勝仰戴之心臣某親迪盛明躬逢熙洽汗青竹  
以絢華藻敢殫紀錄之勤鏤白玉以告名山倍切流傳之望

貞觀十二年太常少卿祖孝孫進樂表

伏以作樂應天誕著聲容之盛審音正律庸求雅頌之遺



敬叶歌章仰干睿覽中謝竊以古之于樂也專尚其實後  
之于樂也僅取其名故德似唐虞始有咸韶之奏功如湯  
武斯成獲武之傳夫何劉漢之興但襲嬴秦之舊高祖制  
房中之樂始於婦人武帝創協律之名制由閹豎何有聲  
名文物徒成鼓舞鏗鏘且名號之云多遂典章之益舛正  
聲遼邈永世滋煩周齊間以胡夷梁陳雜于吳楚欲反古  
而復始當損過以就中爰酌時宜復參古制度諸金石固  
泯泯乎有聲奏之管絃亦洋洋而盈耳上進法宮之御拱



觀斯譜之頌恭惟皇帝陛下天地同心陰陽合德玉帛萬國干羽已格于七旬蕭韶九成肉味曾忘于三月爰著一時之典永為百代之規匪但奉宗廟而禮神祇且將待臣隣而和上下肆令微藐獲在討論臣某厥志惟殫視成有媿雲龍際會幸逢極治之音鸞鳳飛翔行叶至和之應謹撰唐雅樂八十四調三十一曲十二和隨表進呈

張蘊古除大理寺丞及賜束帛表

伏以聖治法天誕廣忠規之益宸恩逮下遂兼名物之



榮恩寵有加戰兢交集

中謝

竊念臣某學非師古才不逮

人自惟駑蹇之蹤親際龍飛之運中書入直每思黼黻  
于謀猷內殿聯班所願備殫於忠蓋念責難在于陳善  
而居安尤切于慮危爰陳大寶之規箴以寓至尊之訓  
戒雖爇火無裨于日月而晁旒或取於蒺藜何期獻納  
之餘即拜便蕃之命刑司進秩既趨棘寺之嚴內筭傳珍  
更被楓廷之渥是將廣通于言路故知特發於聖衷恭  
惟皇帝陛下清明在躬睿哲稽古玩周公之無逸艱難



夙著于憂勤覽尚父之丹書敬怠每存于警省肆令狂  
斐亦見褒嘉職司犴戶之班光賁黻綃之盛慎刑慎法  
當推愛物之仁為衣為裳載錫周身之寵涓埃無補  
衣被有光臣某敢不恪守故常誓殫綿薄刑期無犯務  
持尺法之公朝相與言益勵素絲之節

房玄齡等上高祖今上實錄表

伏以聖帝重光丕著百王之法大君垂式聿新二典之  
書俯瀝微誠仰干睿覽中謝竊以尚書墳典訂訏謨訓誥



之文魯史春秋示褒貶賞罰之法若今述作視古光華  
高祖皇帝救武圖功撥亂反正奮自晉陽之旅遂驅闕  
洛之塵六位時乘萬邦率服倦煩機而將授於昭與子之  
明審神器之有歸式敘傳宗之正皇帝陛下乾元配健  
離兩繼明五百餘年生聖人肇開皇極二十大功為天  
子允協人心於惟載籍之傳懿鑠邦家之美道德風烈  
勿替歷年制度典章可垂萬世宜有特書之實以昭後  
嗣之傳載惟武德之初爰及貞觀之盛事係時時係月



式昭紀傳之華正次王次春茂著編年之法肅登宸御以介  
皇休某久服殊恩叨承明命記豐功偉烈慙無太史之文  
職紀事纂言願繼董狐之直

皇太子謝賜帝範表

伏以聖心仁愛誕推君父之恩宸訓昭明備舉帝王之  
要佩紳知敬執簡思勤中謝自古有道之長實重因心之教

故大禹貽厥之則著在夏書武王燕翼之謀播于周雅  
欽逢華旦宏紹前休伏念某德媿溫文性慚岐嶷出師



入保早齒於虞庠侍膳問安恪趨於周寢仰被義方之  
教曲垂樂育之仁慮汨沒於膏粱肆甄陶於翰墨用假  
名篇之目永為幼學之規即往古以鑒今舉宏綱而撮  
要謂為君莫先於正體而厚族務在於建親求賢審官  
則政事修納諫去讒則忠諫集戒盈所以懲愆崇儉所  
以去奢賞罰必明務農宜力崇文則終始典于學閱武  
則干戈省厥躬展也明謨昭哉懿範堯章舜典煥乎琬  
琰之輝文烈武謨絜爾璧奎之映窺文有耀拜德祗兢



恭惟皇帝陛下德茂本支慶深嗣續受祉施于子爰篤  
敘於彛倫立愛始於家用昭明於訓戒克昌厥後載錫  
之光榮爾十二篇之傳永矣億萬年之裕臣某敢不寫  
諸簡冊佩若韋弦朝夕不忘益著心胸之戒春秋匪懈  
敢言肺腑之私

榮陽外史集卷六十